

Uunga siunnersuut: Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata allanngortinnissaa pillugu nr. 6 5. december 2008-imeersoq Inatsisartut inatsisaat nr. xx, xx.xxxx-imeersoq

(Inuussutissarsiornermut Aatsitassanullu Naalakkersuisoq)

Saqqummiussissut

(Inuussutissarsiornermut Aatsitassanullu Naalakkersuisoq)

Siullermeerinnineq

Matumuuna aatsitassarsiornermi aningaasaateqarfimmi allannguuteqartitsinissamut siunnersuut saqqummiutissavara.

Kalaallit Nunaata Aatsitassarsiornermi aningaasaateqarfia pillugu Inatsisartut inatsisaat atuuttoq killissalorsorneqarnermini nassuiaassutiminilu pitsaasuunersoq, Inatsisartut ataatsimiinnerini marlussunni kingullerni oqallisigineqartarpoq.

Ukiaanerani ataatsimiinnermi kingullermi aatsitassarsiornermit isertitanut nassuiaassutip allannguuteqartinneqarnissaa tulluassanersoq oqillisigaarput. 2013-imi ukiaanerani ataatsimiinnermi aalajangiiffigisassatut siunnersuutip akuerineqarnera tunngavigalugu siunnersuut manna saqqummiunneqarpoq. Siunnersuutip aatsitassarsiornermit isertitanut nassuiaassutip allannguuteqartinneqarnissaanik aamma aatsitassarsiornermi aningaasaateqarfiup qaqugu atuutilernissaata allannguuteqartinneqarnissaanik imaqarpoq.

Inatsisissatut siunnersuummut nassuiaatit tatiginartumik tamakkiisumillu inatsisissatut siunnersuutip sunniutigisinnaasaasa nassuiarneqarnerinik imaqartinnissaannut aammalu inatsisissatut siunnersuutip ajoqutissartarisinnaasaasa annertuut imaluunniit isumaliornartortaqtartut ammasumik saqqummiunnissaannut Naalakkersuisut akisussaaffeqarput pisussaaffeqarlutillu.

Taamaattumik Naalakkersuisut nassuiaatini ilisimatitsissutigaa inatsisissatut siunnersuummi Namminersorlutik Oqartussat pigisanik nalilinnik Aatsitassarsiornermi aningaasaateqarfimmi ilaasusaanngitsunik tiguisinnaanissaat ammaanngissasoq.

Taamaattumik siunnersuutip kingunerisaanik aatsitassarsiornermi aningaasaateqarfimmut inatsimmi § 3, imm. 3-imi isertitanut nassuiaassut, namminersorneq pillugu inatsimmi § 7, imm. 2-imi isertitanut nassuiaassummut naapertuukkunnaartussaavoq.

Taamaalilluni siunissami kinguaassatsinnut ileqqaartoqarani, pisinnaatitsissummik pigisaqartunut pigisanik nalilinnik, atugarissaarnermut siunertaqartumik aningaasaliinermik imaluunniit attaveqarnermi pitsanngorsaaneqarnik tapersiissuteqarnissaq pillugu isumaqatigiissuteqartoqarsinnaalissaaq. Inatsisip maannakkut ilusilerneqarnerani nalillit qanoq tigunerivut apeqqutaatinnagu ileqqaarnissamut pisussaaffeqarpugut.

Taamaattumik aatsitassarsiornermi aningaasaateqarfimmi taamaaqataanik nalilinnik inerisaasoqarani, aammalu Namminersorlutik Oqartussat aningaasartuutaat taamaaqataanik annikillineqaratik, ukiumoortumik danskit naalagaaffiannit Namminersorlutik Oqartussanut ataatsimoortumik tapissutit annikillisinneqarnerannik siunnersuut malitseqarsinnaassaaq.

Taamaalillutik Namminersorlutik Oqartussat namminneerlutik aningaasat danskit naalagaaffiannit ukiumoortumik tapiissutit annikillissutaattut annertussuseqartut aningaasalersortussanngorlugit, Namminersorlutik Oqartussat imminnut inissisimalersissinnaapput.

Paasinninnera malillugu allannguuteqartitsinissami siunnersuutigineqartumi Aatsitassarsiornermi aningaasaateqarfimmut maannamut tunngaviusoq siunertaasorlu saneqqunneqassapput – tassalu kinguaassatsinnut tullernut ileqqaarnissamut pisussaaffeqarnitta qulakkeerneqarnissaa.

Eqqarsaqqittariaqarpugut. Taamatut oqaaseqarlunga oqallilluarnissamik kissaappassi.